

四庫全書

集部

欽定四庫全書

弇州四部稿卷二十

明 王世貞 撰

詩部

七言古體五十四首

再謝汪中丞兼為吳邵武致知己之感

野人久矣甘雌伏把向青冥擬黃鵠欲銜明月報深恩
眼底居然一魚目濁水在地雲在天安能使雲長周旋

倘其流影不相顧宛轉泥途誰見憐吳生亦是銜恩者
尤聞拂拭能增價遠則江東醉步兵近當席上狂司馬
此生慷慨多楚吟蹉跎白首逢知音莫言飽死渾無用
三尺要離徑寸心

壯歌行贈沈嘉則游閩

四明之海一杯水那能便滅男兒趾北過錢塘泛震澤
處處觀濤壯心起已許芙蓉作報恩還將明月尋知己
君不見吳下王元美君不見吾家好弱弟雙披鴻濛萬

古色並卧白雪空山裡以茲相對輒盡觴慷慨悲歌泣
數行世間事事俱骯髒身後人人歸渺茫荆嶺初雲未
覩白燕臺落日居然黃窮來捫舌恐不在客處誇腰那
得強屈指諸侯太寂寂唯有七閩紫氣凌穹蒼閩中日
日捷書至白茅方印勞飛騎轅門秋霜高瘴天幕府春
風在平地中丞緩帶容揖客將軍解衣延死士沈夫子
黃金雖如山願汝唾莫視寸心此際如有托十口何煩
向人計低昂百氏銀不律揮霍千秋鐵如意沈夫子為

汝歌汝今當奈何若過延津語太阿人間未幾衝波去
底事精光出絳河

郭帥致石子云為余小祇園三徑之資走筆志謝
我不能學王武子買地編錢作金埒夜來三徑春雨過
片片桃花屐痕齧君侯采石三神山為余捨置祇林間
它時小隊元戎到應愛青苔點地斑

短歌送袁魯望之南曹

汝南文彩世絕倫紅顏射策黃金門十年潦倒厭朋舊

一日聲名動至尊平津高閣中天起多君不戀平津
邸栢梁詞客凌雲烟多君不和栢梁篇自云一疏更除
目建業青山落人握未論詞林繼江鮑寧甘相府稱袞
伏我自江東退步兵離騷美酒粗成名謝公大是經綸
手莫作空言登冶城

贈華存叔鴻臚還朝短歌一章

君不見相如不肯甘貲郎賦成六傳游故鄉太守前驅
令負弩千秋詞筆增輝光男兒致身厭凡格又不見華

郎亦是文章伯昨拜鴻臚奉使歸門前皂蓋如鴉色玉
壺乍乾歌乍停銀河熒熒隔兩星君星是使我是客回
首浮雲千尺青

歌贈張季子

吳姬奏絲趙姬竹我道新聲不如肉荆山一片秋月圓
琢作張卿口中曲黃鍾入調妖紅肥玄霜變羽萬綠稀
天雲黯冉凝不動窈窕梁塵俱倒飛筠纖小按紅牙句
雙耳流來向心住宛轉那禁里人哭分明可怕周郎顧

憶初相逢俱少年狂呼醉舞春風顛南冠久困燕市筑
布帽却廢嵇生絃此夜聞音獨悲咽遮莫天明髮堪雪
空勞僧起壯士歌延伯雄心為誰發歌曲轉高聽轉難
黃金無情白玉寒君不見胡笳與羌管至今兒女競長
安

為錢世重題懸磬室

錢郎坐我懸磬室要我為作懸磬篇我歌欲就須斗酒
君言室中無一錢空梁頗受落月色北牕僅可涼風眠

門前黃葉霜如洗，刺促歸來愧妻子。
已少成都學士裘，祇饒東郭先生履。
挂壁蠨蛸寒欲墮，當門烏雀時空喜。
自矜顧愷為前身，丹青在手終不貧。
只愁妙畫通神去，依舊能生釜底塵。

題周生所攜花冊舊詩後

長安春日千花發，千花色奪千門月。
醉後花傳詩裡神，醒來月向花前沒。
江南此夕真潦倒，回首長安夢中道。
欲與何戡唱渭城，可憐才盡花亦老。

游張公善權二洞歌寄孔嘉仲蔚淳父伯起幼于兄弟

我昔攀天門下視九土青偶然咳唾忤風伯吹落江湖
成客星男兒生不能學向子平棄家游五嶽又不能學
素夏甫坐卧土室中步武名山惜雙脚以茲欲作二洞
游跌宕不辭真宰愁培塿張公頽然土丘一線乍啟萬
奇中抽陰風冥森下無際時見磔鵲仍驚虬差我中堂
聳玉柱的皪兩序懸鳴球白雲一歸不得出石牀眠雲

古時濕太始以來無日月燭龍銜珠曜璇闕野夫出茲
山兩足已如臙猶能賈餘勇對客却籃筍玉潭濯皎潔
瓊樹擘輪囷秋風興來骨欲顛挂帆飛榜凌蒼烟荒雞
一鳴至善權善權浮屠高插天高插天國山山青不能
鎖吳時碑隋時殿唐時松栢夾道左陰巘盤擎白龍跡
朱梁擘畫雷神火坤軸兮自搖乾門兮陡開上有谿訝
蚺蟻之巖崕兮構飛空之樓閣下有渾淳訇磕之流湍
兮殷圻地之風雷接睫燕蝠鉤衣莓苔空青乍明水碧

閭赤瑕駁犂黃金摧冷然仙樂奏其底令我欲出仍徘徊揮手謝山靈裁書報彭俞及示黃張二三子搜奇擅秘須吾徒自古名山在天地珍重能容異人至宛委雲藏軒帝書祝融雨洗司空字張公之名經頗傳善權泯泯殊堪憐我歌二洞汝當和烟霞吐色三千年

周孝侯廟歌

周侯廟貌江之干中天五六蒼松盤荒墳纍纍在其下人云此地藏衣冠長橋瞥見濕雲合南山不散腥風寒

尺言蛟虎祛除易誰道豺狼行路難不獨捐身報天子亦要將心酬國士時危豸角何處容事去龍泉傍誰洗白骨猶令老氏慄赤囊翻助梁王喜男兒一擲萬事伸惜哉典午天沈淪生吳死晉君莫問千秋豫讓為何人

贈別燕山蕭君之蘄州守

蕭郎自分百里權青袍陸沈十四年寸心祇折吏民上尺書不到公卿前時時却過王生里謂言磊落當如此

縱然未得二千石依舊杜陵一男子昨者忽騎五驕驄
別我要我歌楚風皂蓋逶迤挂山月玉壺旖旎酣江楓
看公一身俱意氣文苑仍須傳循吏長禧于今饒政術次
君到底存交誼黃金鑄身難鑄心臨岐慷慨為知音大
夫故有蘭臺思欲問王生何處尋

梁長子自泰山歸以百三十韻詩見誇因成俚歌
奉嘲

梁伯龍真龍伯自從釣鰲忤上帝壓之尚餘三百尺笑

語王先生長者所苦為杯捲男兒失意則蓬累焉能委
身眉睫間北渡洪河東游泰山舉頭出天門舒手捫日
觀白雲封中起袖欲割其半嶽帝不敢呵玉女一笑粲
是何魍魎來令我山靈怖欲竄梁伯龍醉攜金壺汁倒
翻玉女盆詩成一千三百言千三百顆明珠圓長吟短
詠不肯眠西風吹骨骨欲顛其若囊中無一錢王先生
為汝作詩券減之一字一匹絹天公籠統無月旦買者
為誰復誰怨梁伯龍勿懊惱歸來從容問若姥東家侏

儒日苦飽長者不呆真是寶

張伯起作懷賢行念子與彭孔嘉病中有日日禮
醫王語戲作俚句為答

今者歲閏愁黃楊又聞處士星無光彭翁病消走病痛
張君日日延醫王醫王耳奪世人口世人欲殺君獨否
竭來攬鏡忽大笑髡黔剝剝無不有朝供一菜粥一甌
束書萬卷從蠹謀鮑家累句時觸吻肯共花鳥爭春愁
世人視我贅疣耳於中近得希夷理八百年後君自知

斷不相從老彭死

贈松墟上人

阿蘭小結長松邊
松風吹鼎茶浪圓
朝籤藥裹時廢食
夜誦蓮經恒不眠
并刀築頂碧香發
雙瞳剪破面裁月
聽將半偈了自知
會取西來向誰說
鸛鷀貫酒春相過
生公石上好隄俄
莫言陶令生耽醉
自是禪機醉裡多

善果寺杏花下歌

君不見杏花東風得意時
曲江千枝萬枝雪爭如阿蘭

若邊一株樹獨立亭亭媚春月欲言不言如有情欲墮
不墮態自生輕盈乍怯霓裳舞婀娜疑驚玉笛聲清尊
綠酎催未已翻遣窮愁醉中起萬事玄都觀裡挑一身
安豐道傍李片片飛花點接羅牆陰覆井日平西酣來
一枕江南夢莫遣流鶯恰恰啼

支郎歌

支郎逸氣不可當少年俠客荆飲裝千金豈惜結劍士
尺紙遂欲收扶桑偶然失意去府主賣藥長安大道傍

為飲真人上池水
竭來供奉金門裡
藥囊手提燕慶卿
刀圭立起號太子
慷慨莫謂秦無人
鄒侯吹律天下春
雕弧左射白額虎
明珠逆摘驪龍鱗
此時支郎叅石畫
男兒有心人不識
一字能迴日月光
片言坐致雷霆力
我亦曾師滄海君
中年麋鹿更為羣
北風一夜吹我出
淚落平原原上雲
鷗鷺脫向陽昌肆
欲與支郎暫時醉
眼前豪傑君自知
羞殺桃花五陵騎

野人歌自嘲

鷄鵠畏鐘鼓魯人不肯聽三日饗東門栖栖竟何營白
魚自稱龍豫且搖其手蠹尾短鐵鉤胡為在若口人道
野人無所干曾騎款段客長安人道野人有所求白雲
高卧僧房幽野人雙足頓如絀野人雙鬢半成雪杖頭
沽酒錢欲盡袖裏投書字將滅紅塵風吹大道間若個
不作紅塵顏老鴟啖盡腐鼠骨始信鷄雛心自閒

南岷山歌為御史大夫南充王公作

君不見古皇鴻濛時參井星精夜墮地化為南岷山山

高八千丈力奠金維控西裔芙蓉片片青霞疊中含太
始以來雪九井遙吞灌口烟三峰倒映峨眉月鸞飛鳳
儀蜿蜒回龍

傍山名

星斗夕虧風雷晝封挺孤碧之峭削

鬱羣蒼以龍嵒下有寒泉漱芳玉誰云出山令泉濁瀉
作嘉陵江水聲日夜潺湲映天綠山人少時此山居薜
蘿裳壁雲儲胥時吟蜀肆君平易不著臨邛司馬書北
山無猿鶴東山有蒼生以茲拂衣出聊作應世行為雨
為雲潤七澤竚然豈負茲山色麟閣今標如礪功龍門

復表回瀾力南岷山何足擬從茲以西二十四萬里岷
崙中天作天柱山人之名亦如此

題僊巖文丞相祠

丞相倉皇出虎穴夜半真州鬢成雪江南是處萬馬塵
海上堪揮一腔血丈夫變名難變心此心在宋不在身
從行少年四五輩個儻千秋荆聶倫岷山波腥鼓欲死
柴市星寒碧初委若使黃冠自北還猶能赤幟從東起
僊巖之山鬱嶙峋二百年來日月新毋論削跡勤王地

大有衣冠薦芷蘋君不見真人奮淮北金戈立掃氈裘
色鄂國暗鳴表後身瀛公宛轉留遺息解道金元運已
微只今白羽畫長飛鐵衣自風石馬汗一夕犁庭轉戰
歸

崑溟歌贈楚人曾生麟兆

我聞西有崑崙山山高不可測天地垂欲合又聞東有
大溟海海深不可測日月所出沒元始丈人竅鴻濛搏
揣兩烝為兩雄上有玉京下三艷真僊靈皇之所封神

鰲背負玫瑰柱燭龍口作玻璃宮嗟嗟丈夫乃在世間
齷齪那能言我欲抗手如鳥奮龍我欲振足如獸觸藩
飄然凌虛出紫垣八景玉輿三素幡章亥為嚮導造父
為乘軒白鵠血腥豈足洗蒼虬翼在時騰翻焉知身所
詣但見歷歷千白榆舉頭若可捫崑崙城何森切光彩
一何凌亂時聽嘈嘈聲天門漏銀漢玉女碧綃冠芙蓉
粲然半啟含桃紅為言此水既東逝劃作雙帶橫衆中
一月一書附赤鯉但逝不返如秋蓬咄哉恨殺扶桑公

殷勤語王叟掉頭忽東去下見扶桑公其居半雲霧醉
我玄霞漿三日不得語一語一淚零淚下如懸河天老
恹相假遂無西逝波扶桑公可柰何曷不學王叟耿耿
徑寸間揮霍宇宙若彈指五嶽五拳石四瀆四杯水道
逢楚狂人自稱崑溟子問余何方來又復問所以崑溟
子汝亦知南溟有魚名曰鯢鯢之大不知幾千里化為
鵬鵬之大亦不知幾千里鯨宮水擊白波立羊角風搏
黑雲起朝從南溟游夕宿崑崙崙崙趾噫吁戲男兒變化竟

如此

雨中痛飲作

長安城西一畝宮儘可逃名藏白首鞋底風塵多自誤
壺中天地何不有枝頭浙浙掃鬱蒸雲脚垂垂打清晝
但令吾黨鯨鯢吸任它大陸蛟龍走竹林自昔未逢僧
蓮社于今方縱酒已滿七人那用覓即眠千日非云久
才間抱甕便舒眉除却傳杯須袖手鸛埵聲哀馬足聽
鷓鴣夷腹大唯堪受彷彿似有辟書來此物毋勞挂吾口

夢中得語云百年那得更百年今日還須愛今日
因戲成短歌

化人宮中百事無道書一卷酒一壺枝頭黃鳥聽作曲
西山白雲看作圖朝愛朝暎上東岫夕愛夕陽映東牖
任他故人不通謁任它朝事不挂口偶然案頭餘酒杯
偶然躡屩山僧來自斟自醉當自去禮豈能為我輩哉
昨夜懵騰意超忽寢時得語醒時述百年那得更百年
今日還須愛今日縱能拂衣歸故山農畊社劇亦不聞

何如且會此中趣別有生涯天地間

海嶽壯游歌贈周子

周郎一笠輕九州拂衣自稱海嶽游安期拍手子晉笑
洞府豈必非君流青精暫裹天上飯黃金或散中原愁
總道乾坤少親故揖余欲得烟霞句西出應題菡萏峰
東歸好挂珊瑚樹君知梅尉有僊骨當時只傍吳門住
酒間贈何翰林良俊

昨遇何翰林宛如李供奉離披宮錦袍錯落瑠璃甕自

言長干嬌小娃纖彎玉窄乾紅鞵袖攜此物行客酒欲
客齒頰生蓮花卻謂醒齷子但飲莫相詫令我身後名
令我作僕射不如且共此一杯人生有情良快哉諸君
倘過長千里雙蛾掃盡黃金堆

題友松圖為尤生贈朱君

此君似是陶隱居愛聽萬樹霜風呼生平磊砢誰與徒
大兒天門五大夫小兒少室雙虬鬚尤生畫手如韋畢
為寫生綃助蕭瑟倒幹橫穿太谷雲輕陰坐障徂徠日

琥珀作脂玉作苓
僊材往往能通靈
野夫手荷長鑱至
指取高堂千嶂青

九龍山歌

昔我游茲山探瓢酌春月
空色眉宇明清芬齒間發
蒼虬舞月月未殘青鸞嘯
風風欲搏白雲洗盡太湖
出人烟萬井梁溪寒此圖
此記為誰作讀作
做蕭瑟嵯峨眼中
過彷彿如聞梁甫吟君不
見九龍山深一龍卧

褚河南文皇哀冊歌

長安城頭日中暝萬戶呼天哭髭聖椒房總推太尉公
椽筆卻付中書令爾時玉匣歸蘭亭如獄寶劍埋寒星
賀拔雖亡宇文在此冊居然見典刑巧若嬋娟態相媚
拙若老將藏餘銳讀罷疑瞻天日姿看來尚挾風雲氣
功名真主詞良臣千秋呵護當有神不見昭陵六石馬
至今雷雨汗長新

題文與可畫竹蘇子瞻詩後

石室先生岷峨英指端宛宛八法精墨池寫出淇園青

雪堂一老囊中豪胸中屈蟠金錯刀渭濱派作北海濤
天生兩奇令相值半幅生綃闢秋色長離翔空舞玄翮
一舞一翮黃金鈞坐令篋笥烟雲新寶之者誰緱山人

題海日圖贈劉司馬

天鷄呌沈碧金波騰太陽煜若萬珊瑚迴光射扶桑中
有三老人白髮何昂藏競手海屋籌兼攜華封章昔逢
百六天地荒長鯨吸海海欲狂一書盡護諸校尉片檄
立散千餘皇功成肯落鵷夷後酒船茶竈無不有葵藿

雖懸捧日心衡荆且袖澄清手蓬萊僊人王子喬中年
孤落仍萍漂挽君鵬背且轟飲看君水擊搏扶搖

題蔡端明蘇端明黃太史米禮部趙承旨墨跡後
效少陵飲中八僊體

君謨郢斲何太工宛若老將藏其鋒即論草草無凡踪
拙生土木金馬蒙

書家謂蔡
土偶蒙金

眉山命態嬌且豐阿環玉

膚雙筋紅酒酣斜捲霓裳風爾曹往往論纖濃莫云墨

豬豬亦龍

書家謂眉
山墨豬

豫章骨立兒作翁踉蹌獨上峨眉

峰翹足下瞰中原空不辭墜折蒼藤封襄陽翩翩趨若
風錦衫危帽青驕驄跳盪百戰無衡鋒耳輪躍刃足躡
空當時鼎立難為雄筆塚處處騰秋虹晉鬼夜哭悲途
窮吳興指端天與工墨池墨瀋蟠胸中翺如威鳳翔岐
豐山陰之宗誰大宗王孫隆準真乃公

過邯鄲呂翁祠

昔時盧生道邯鄲干謁不止恒苦饑行逢呂翁為歎息
授之一枕同龜茲出入將相五十載覺來黃粱猶在炊

檀槐共鬪螻蟻穴蕉鹿展轉令人癡我方夢醒出塵境
胡為復逐東風迷汗顏強拜此翁像拂辭自讀唐人碑
誤傳茲事屬劔叟不識開元年為誰石鑪灰燼燕遺矢
粉面龜坼蛛垂絲兒童戲偷鐵屈戌烏鼠爭穴青琉璃
呼茶一啜槐影淨黃冠三四前致詞乃聞廟貌出妖豎
彼豎軒帝稱天師鼓脣立噓寒暑變彈指能令河嶽移
漁陽石媚琢鼎鬬尚方金軟鐫罌愚北門學士促草勅
南省尚書稱奉祠天開電掣妖倏滅香火豈復前朝時

此翁亦作邯鄲夢若遇盧生翻自悲我從明日挂冠去
蝴蝶由他知不知

漢女行寄張助甫

漢帝惜傾城雙蛾當三千偶然轉盼失顏色燿如流波
墜九天阿監搖脣婕妤笑看取它人領光耀寶鏡羞窺
永巷身銀燈望斷長門詔我從選部識張卿天下紅顏
俱却行片言進退羣公坐一字低昂千古名不合文章
犯牛斗也學吾曹厄陽九扣角敢唱龍蛇歌折腰自稱

牛馬走當時廣平百不憂謂言茂陵將見求金魚豈羨
鵬鳥地黃鶴獨喚蒼梧愁三楚寨帷聲赫奕百城墨吏
秋霜懾故舊俱傳勃海書何人為發中山篋即今龍卧
汝潁間杜門日翫浮雲閒但令班女重升輦爭道君王
不賜環

登卽鄆叢臺有感作叢臺行

卽鄆叢臺已非舊請說卽鄆舊時有吳家倩女苔乍榮
和氏連城月初剖臺上奏伎卽鄆姬臺下拔刃卽鄆兒

銜將恩去身俱賤報得讎來主不知君莫謂平原好公
子三千去後應無幾堂中客傍信陵門軍前士死長平
壘叢臺不盡更檀臺回首豪華安在哉自是魯連東海
蹈千秋白日聳蓬萊

長短句調子與補楚臬

天目山人戀山住天目之神訴上帝往者先朝時此曹
落魄不得意搜剔魍魎調弄元氣令我刺促竟歲無時
寧胡不驅之向燕京燕京酒價一夕增七貴五侯倒屣

迎吹噓大路寒暑出指顧間闔風雲生故人見君面移
尊日歡宴少年見君詩下帷日吾伊忽聞除書喚依然
舊銀艾節度唐麓官長沙漢天外銀艾笑君雙鬢絲鬢
亦笑君銀艾遲腰如梧捲項如磬安用馮馮大腹為為
汝歌汝為舞但使文章不後王斷令名姓能張楚男兒
失意一生得意一生莫悲禰衡莫弔屈平若云流放比
君甚千古不斷湘江聲

歌贈穆員外

穆生不惜王家醴却惜申公困胥靡自言一寸已許人
六尺何妨為人死白晝閭闔風雷寒解衣為掩血肉殘
即賣修行里中第還懸神武門頭冠手挽柴車出西郭
朝煮舖糜夕湯藥已拚同日效左儒差比空山勝羊角
濁漳河邊逢石郎哽咽為我談行藏此身係穆不係石
欲報滄海恩難量君不讀西京游俠篇東京黨錮傳若
曹名使那足羨男子酬心不為君北風立洗青天面

栢葉仙人歌

栢葉僊人不須字栢葉殮成朝上帝昨者玉京高宴歸
却遇劉安守天廁讀書刺促生不休偶然真籍誤見收
赤明龍漢微茫事說著羣僊總掉頭

山西丈夫化為女子

萬事反覆那足齒山西男兒作女子朝生暮死不自知
雌伏雄飛定誰是謝豹曾聞受朝謁於菟亦解談名理
渭南巾幗不可呼此曹變化無時無只今齷齪不能去
羞向人間喚丈夫

故東郡太守翟義為漢誅莽不勝而死其事甚偉
而郡人不知祀之余始請祀於名宦祠為作翟義

公歌

東郡太守翟義公欲噓炎燼為長虹皇天未啟赤符子
一寸血作千家紅汝南殃及枯骨冢濮陽改築鯨鯢宮
中原掩耳宣大誥偷淚自詠平陵東侯王吏民四十萬
何面死謁隆準翁昆陽雷動虎蹤滅太液波沸蠅聲窮
高廟不請政君罪雲臺但書列宿功抵今魏守祀名績

俎豆不載何其蒙爾曹只知狄司空近聞依稀田侍中
世間萬事在反掌成敗那得論英雄椒漿一灑千古淚
靈旗忽若搖空濛憶昨彭城過廉里里中老人誇大龔
漢家九鼎二子在嗚呼豈係桐江風

定州畫壁水二堵妙絕天下望之若真水起伏潞
洄有浩漭萬頃之勢州志謂為吳道子畫非也寺
成在道子後百餘年余歌以暢厥美仍為志解嘲
栢林寺中千株栢蟄月寒虬怒生翼誰為吸盡西江水

一吐阿蘭雙素壁永夜旋愁牛漢翻中堂陡見龍門開
更疑滄海浴日初不斷瀟湘帶天色烏王睥睨饑欲動
娑竭蜿蜒避無策驚毫欲捲阿耨枯醉瀋橫拖鷺頭碧
恠無蘭木為穿進縱有并刀剪不得寒聲颯颯生清瀾
令我三日欲卧觀借問畫者誰畫筆勁似秋鷹搏無乃
孫知微定非楊契丹試披圖經讀謂是吳道子此寺此
壁天福始開元之人人已鬼只今何限丹青師好手吳
生那得之君不見唐朝葉道士攝魄為寫松陽碑

齊河行與于鱗醉別作

與君痛飲齊河頭齊河萬魚皆溯游十年再迴日月照
千古一散乾坤愁胸中雲夢各爭吐眼底卽鄆焉足求
玉壺未缺如意怒葡萄欲乾鑿落憂我更起作鸛鵲舞
那得不典鸛鵲裘醉時抗手城南路大陸青蒼莽回互
國風一示延州來春雪三周華不注吳綸鄭縞各言好
趙璧秦城總相慕路人聞余言自疑沾沾者誰令人妬
天下模楷李元禮江東獨步王文度

薄暮同諸君游紫雲洞

手扶藤封踏斜日窈窕玲瓏石為室幽泉伏竇涓不枯
半壁嘘雲裊難出野夫絕叫稱大奇為君痛醺三五卮
醉即今宵解衣卧祇畏此中猿鶴疑

長星行

長星勸汝一杯酒汝是君王掃愁帚若令帝座長不移
此地猶為伏羲有茂陵劉郎勢絕倫五十餘年徧採真
欲覓蓬萊何處是不如歸擁李夫人

酹孫太初墓

死不必孫與子生不必父與祖
突作憑陵千古人依然
寂寞一杯土道場山陰五十秋
那能華表鶴來游君看
太華蓮花掌應有笙歌在上頭


道場山絕頂望太湖

危閣聳層巒松濤五月寒太湖
十萬頃斜浸碧闌干杯
中映瀋汨檻外騰超忽迴光競
千鬣窮島迫一髮青天
不道向外生白日如從此間沒
三萍漸近三餘皇便欲

呼之汎渺茫縱然未入林屋去且指包山尋故鄉

立秋日旅懷為陳人體

冉冉彤雲送火輪脉脉銀漢寫金旻曲裏清商才入破
腕中團羽不成新身如合浦初黃葉心在江東欲紫萼
耐可辭鶯友那能逐鴈臣



弇州四部稿卷二十

欽定四庫全書

集部

弇州四部稿卷二十一

詳校官侍讀學士_臣陸伯焜

中書_臣劉源溥覆勘

總校官原任中允_臣王燕緒

校對官檢討_臣慮應

謄錄監生_臣閔思紀

欽定四庫全書

弇州四部稿卷二十一

明 王世貞 撰

詩部

七言古體四十首

歌行長短句題橘軒卷後

昔有蘇耽君丹成不肯去乞取巴中老龍唾餘核化作
江陵紫霞樹鑿井蘇君陂下通長桑所食之上池一杯

復一葉千人萬人却杖歸其後八百年陸翁手種樹乃是翁家鬱林太守之所懷聊採僊君名用以顏其齋翩然渡淮水不憂此樹化為枳賣藥長安中攜壺汝南市交州薏苡讓功力魏苑葡萄失顏色丹苞瓊瓢崖蜜寒坐令消渴蠲文園何以報汝披琅玕雲舒錦粲龍虬蟠更後百餘年有孫髯叅公笑謂王子腐史何庸木奴千頭以當素封寧如寶此卷洞庭秋霜篋笥中

余作此歌題橘軒卷因有一雅謔附上髯叅公

昔蘇僊翁作橘井其裔孫長公學士草陸吉傳
似為陸氏張本公家鬱林太守懷後乃復有橘
軒繼僊井之蹟然則蘇陸二氏可稱累世通家
也髯叅公能無一笑粲否

贈沈郎歌

閨門昔時花滿烟沈郎落魄美少年玉壺酩酊春風前
吳宮粉隊人三千蘇張舌底藏嬋娟
月落紅淚薦
鳴雞不斷盧聲顛問着牀頭無一錢
酬心未了雙龍泉

中年顧景忽自憐坐使萬累空中捐中丞高齋學士筵
烏衣諸郎時見牽禿衫踞坐風脩然當尊雅語真珠圓
醉時有神醒不傳興劇便就東家眠石湖虎丘花月天
手提鵝夷呼趁船小景幻就菖蒲箋丹青自許前生緣
文君藜羹甘入咽肯從方朔割彘肩七尺不受朱門權
人烏山宮多酒仙吾與沈郎俱刺員不醉且誦逍遙篇

題孺山書屋圖

石田老人富丘壑湖雨嵐烟筆端起江南佳麗到不乏

吳興諸山若個是書聲雜出飛瀑外高枕時橫白雲裏
人云絮酒來南州此山名孺成千秋尚書讀書此山頭
書成出柱中原天歸來賴玉圍腰圓冰心不愧南州賢
出山住山俱偶然有足肯踏終南顛

題懷素千文真蹟後

禿師少來負書顛芭蕉萬葉凝松烟自矜二王無我法
懶與融師稱小錢鄔叅軍語釵股折張長史筆驚沙翻
夏雲漏雨各自態寒猿渴驥俱奔泉垂一千年龍劍出

過八百字驪珠圓

缺一百四十一字
文太史徵明補之

毋論貂尾貴難續

即賞虎賁神不全
戈法宛然自堪辯
司空縱似亦可憐
紫微初入六一舫
彩霞再墮剡溪船
河南哀冊右軍札
白虹三縷騰奎躔
墨池餘債倘未了
伴汝游戲終殘年
歲暮行送周公瑕應聘北上

歲云暮矣霜風晃
周子束裝問江北
閭門羔鴈俄已羣
薊臺驂騑歛生色
碣石天高別築宮
平津月照新虛席
即辭太傅先奏記
又道司空勤見辟
兔苑留裁上客賦

鴻都待灑中郎墨自吳詞客推彭年周子聲價相後先
中原驟得王李法秀句欲柱東南天子墨客卿晚來貴
白雲先生神與傳吳興練裙殘半幅戴山羽扇爭百錢
雞林雖買舍人句狗監不薦賢郎篇以茲卧病桃花塢
首宿瀟瀟映環堵隻字能飛鴻鴈外六尺居然蛙黷伍
時來莫採南山薇吾鄉故事知者稀君不見先朝白首
文供奉小入蓬壺旋拂衣

吳虎臣謁予兄弟吳門將北訪于鱗且云欲與汪

中丞伯玉共建維摩精舍賦此贈別兼用示嘲

吳郎嗜酒好詩雅成癖千金散盡家四壁巷譏室謫了
不關瞪眼模糊向天白云得尚汪中丞所願更識歷
下生王家兄弟亦不惡四子者片語足定千秋名以茲
杖策來吳會擬踏天門望滄海白雪呼來片片寒青春
醉後堂堂在中丞晚節師維摩一宅施為寧堵波吳也
自稱大檀越其若囊中羞澁何顧余亦有王珣宅為君
布金不盈尺莫以莊嚴願未酬蓮華會上低眉色

普晦去吏為道人為伯玉中丞募建肇林精舍值
歲儉鮮應予辭晉臬未上聊出餘俸助之走筆短

歌以贈

我欲效法施本來無一法我欲效財施匹如病阿育一
頗梨果作檀越汝今辭吏我辭官芒鞋共踏春山寒化
城原在中天裏始信娑婆著腳難

吳門錢叔寶為吉安龍君作春江圖予為作歌題
贈

東風吹花繪吉州江學城頭吉字流鳳凰嶺上挂飛瀑
片片併入桃花湫春雷喚龍龍欲起吸霧騰波幾千里
明月猶銜額下胡蒸雲却化鱗中水東游揚子轉入吳
洞庭君起錢唐趨已看崢嶸露騰蹕豈少潤澤回焦枯
錢郎畫君在阿堵點着君應便飛去曲江紅杏紅刺天
是君為天行雨處

大中丞濟南谷公家近滄海因署別號見志尋聖
聰簡眷開府吳越東南諸海復在四履故吏王生

嘗辱公國士之知乃屬吳人錢叔寶為圖而歌之
海為百谷王蒼然帶燕齊燭龍張眸七曜奪巨鰲頰首
三山低迴風疊浪恒蕭瑟錯落珠璣閃蛟室蜃氣晴噓
析木雲雞聲夜喚扶桑日萬古長容天地輸九秋不動
魚龍都明公弱冠傍海屋已下鐵網鉤珊瑚偶得浮槎
名貫月直汎銀河叩星闕帝女壇前五白茅天公詔底
雙黃鉞可但宗慤乘長風東南自此戍烟空三千犀毗
水組練五百魚麗雲艨艟昨者明州大計吏樓船捧觴

伏波跼已傳淮水縛長鯨復道越裳來白雉如逢召寫
漢麒麟中國須歸有聖人借問誰謀渤海對王生元是
一波臣

休承在湖學以此十五幀見寄瀟灑冲澹故不易
及因題其後而藏之

湘笈秋山開剡藤墨龍舞得君十五紙可敵城十五當
其適意時筆所未到意已酬問誰圖者復誰氏十載重
覩文湖州

臨江二王帖歌

右軍正行妙入神大令破體皆天真墨池一派流不斷
萬古誰步瑯琊塵蘭亭之脗何紛紛片紙幾盡江南珉
只今諸帖重淳化奚家墨潘猶如新李懷琳手王著眼
珉珉遂混連城珍臨江選石最精絕二王以外知無人
麝煤輕拂薄蟬翅苔文細暈生魚鱗高帝子孫盡隆準
坐使重儻那得伸寶船再墮野人手貧里于今知不貧
牙籤玉軸小貞觀雄飛雌逐家延津明牕響榻日再過

縱拙肯作平原筋

定武蘭亭真本歌

髭龍蛻骨咸陽陌玉匣千秋悶神蹟天憐墨派不欲湮
為掃中山一片石樂論黃庭總非故褚臨馮搨知難敵
隆準雖稱高帝裔赤符自許真人獲面面看來俱是態
頭頭勘罷無凡格似從天骨見風流小展驥羣爭辟易
世人耳觀論肥瘦飛燕阿環俱國色一字能開八法先
分身立作諸家式陳家老叟似北禪趙吳興乞不可得

幾三百年落余手更數千本誰其匹玉躡金題豈增貴
連城照乘難為直野夫黯澹一瓣香相攜去訪山陰宅

經封丘記故尉高適詩有作

我行長夏之封丘紅塵罨汗汗不流東鄰苦酒苦於藥
西舍濁醪濁似油馬頭黃綬令勿跪恐有當時高蜀州
拜迎官長亦細事鞭撻黎庶將何求一官大小各有味
不置齒舌應即休諸君異日但北首看我歸騎凌清秋

過長平作長平行

世間恆事那有此四十萬人同日死白骨高於太行雪
血飛迸作汾流紫銳頭豎子何足云汝曹自死平原君
烏鷄飽宿鬼車痛至今此地多愁雲耕農往往夸遺跡
戰鏃千年土花碧即令方朔澆豈散總有巫咸招不得
君不見新安一夜秦人愁二十萬鬼聲啾啾郭開賣趙
趙高出秦壘也送東諸侯

張幼于惠臨洮賜硯歌

蒙將軍掃中山敵歸向臨洮斷地脈剝出堅珉三尺碧

祖龍爪端五花黑一時漆合毛穎交千古泓開墨君宅
臨洮金人血中土天畫此石歸沙磧歙州龍尾近足致
端溪鵲眼新堪惜淳熙主人睠西顧玉堂畫草平番檄
中涓但覩天顏喜學士驚傳百朋錫小擊疑聞泗濱磬
捧來似剖藍田璧宸章姓字刻琬琰烟霞不散烏皮席
後四百年竟誰在楚人棄弓楚人得張生豁達烟過眼
王子貪饒咽生液嗚呼右軍風字世不見令我青箱久
無色珍重題詩一報張夙生或結詞林識

高克明溪山雪霽圖歌

丹青筆長意苦短帝遣營丘寫清遠范寬老死克明在
與乞天公舊時晚三絕親教聖人贊七尺不嚇侏儒飯
玉堂供奉寒歲麤瑤花片片墮瑤池朝回小閣晝挂笏
却憶溪山初霽時羲和鞭輪逐滕六飄瞥差栽壓茅屋
擺脫千枝萬枝白洗出三峰五峰綠陰崖猶冒太古絮
陽壑爭傾片時玉枯槎頂禿瘦骨愁小艇不敵風颭颭
長年袖手喚不起疑是興闌王子猷狐帽蒙頭看山坐

楫拙煨醢酒權大縱無灞陵驢背詩肯作長安被中餓
乾坤烏奕揚清輝萬象賈勇精神飛興來毛穎縱橫出
一點一綴皆天機欲知真宰愁絕處此翁盤礴初解衣
吾家愛弟饒畫癖購得圖看三歎息毋論骨格超馬夏
勝代何人辦焦墨虛堂把翫六月寒指端秀色來眉端
便欲移家此中住徧踏瓊瑤天地殘

題王晉卿烟江疊嶂圖蘇子瞻歌後仍用蘇韻

千濤躍江千疊山晴烟籠山山吐烟與君挂笏聊騁望

但見一氣長蒼然細看雲腰出矮屋復有木末奔寒泉
漁網迎陽罨小港布帆吹簾彌平川王家禁轡得此景
骨格迥出荆闕前胸中八九小雲夢筆底萬頃滄浪天
眉山學士高興發秀句欲奪春江妍以茲不愛玉堂美
去買陽羨山中田此圖此歌有神護小住人間四百年
摩挲絹素開黯淡飛舞醉墨藏便娟卧游齋頭一展看
恍若身對湘巫眠鼎湖髯挂都尉去學士亦作芙蓉城
內僊鄒陽後身薄自曉舍我誰結三生緣嗚呼江烟幻

滅在俄頃萬古不廢王蘇篇

黃山歌題叔寶畫贈新安吳孝父

吳生方袍白綸巾顧我自謂黃山人彭城錢穀畫絕倫
復與黃山傳其神此山雖小據地脊根壓天目排秋旻
三十六峰玉突兀千一百仞金嶙峋廣成授丹軒轅煉
至今草木含陽春病夫投袂見起色擬踏青鞋尋隱淪
人言吳生不復此山住大舩我舸五湖水前者長干一
醉歸橐裝盡付金陵子已同嘉賓令財盡復慕瑯琊為

情死真州橋邊酒似油長卿去逐文君游壁立猶存上
林賦衣單不典鷓鴣裘此山猿鶴夜啼怨其若吳生方
掉頭嗚呼人間奇事不易述宗生欲挾衆山歸吳生欲
挾黃山出男兒有心復有足安能兀兀窮巖守苓朮要
使茲山長屬君吾歌與穀丹青筆

戲題錢叔寶臨鍾馗移居圖

開元宮中鬼稱母丞相中丞恣為蠱帝遣鍾君嗣黃父
逐鬼無功謫荒土山阿被蘿者誰姥攜雛索裝橫周路

髑髏啾啾泣相語夜半應煩老桑煮鍾君好往一返顧
木客跳梁山魘舞君不吾留稍安堵與君傳神叔寶甫
異日相逢莫相苦

楚游歌贈顧季狂

季狂兩脚健於鶻踏遍中原頭未雪歸來細君席尚冷
揖予又作青山別人生好游可奈何洞庭瀟湘秋欲波
秋風蕭蕭楚游子若為楚舞吾楚歌我舸大扁向荊州
銅鞮女兒踏不休宜城酒滿三百斛爛醉來登黃鶴樓

君莫問鸚鵡洲滔天白浪誰能識君莫問太傅宅過頭
青草無遺跡武陵桃花縱自春其人往往多沈淪羊家
開府汝府主有足那令驅避秦蘭臺大王風倏忽無定
嚮巫峽神女雲却墮滄波上唯有衡嶽赤帝主祝融峰
太嶽黑帝主真武宮呼吸神爽與天通頻視塵世如蟻
螻李狂子遨遊二帝間其樂不可言手持綠玉杖夜叩
黃金門稱渴求沆瀣跪翻洗頭盆顧掃石壁淋漓墨汁
搏弄元化真宰為泣李狂子聞汝昔時游武夷青鞋皂

帽濃髭眉醉罵紫陽師盡揮橐中貲衆謂鶴背公或云
狐父兒季狂子丈夫蹤跡毋太奇太奇往往來人疑何
如還家共父老看放黃犢春郊耕

錢叔寶過余作淺色谿山深秀圖長卷一時諸君
皆有題咏居兩月叔寶復作水墨一卷見遺且云
平生能事盡此矣展覽不勝窮兒之喜手筆此歌
以謝

錢翁五月踞余席丈八桑皮寫秋色頓使牕頭開翠微

復令篋裏流縹碧歸家逸興殊未已更潑苔文幾番紙
擺脫驪黃見神駿洗盡鉛華出西子野夫那得不破顏
此身如坐清冷間未損嘉賓一日索買盡沃洲千萬山
吳中好事家相屬得隴何人堪望蜀斷無雙月映連城
或可崐岡矜片玉君不見先朝沈啟南勝國黃公望丹
青一派流至今前輩風神說猶王錢翁錢翁好自愛野
夫欲作祇園障

沈啟南春山欲雨圖歌

千山坐失千巖從似是帝遣雲君封巫鬟不辨青媿嬪
華掌難撲金芙蓉已應義馭走驕日或有雷門呼蟄龍
天閭元氣漏不斷倏忽絪縕二儀滿遠看隴樹春欲無
近即庭花暝差緩村村麥苗俱望幸川川魚子希休澣
欲雨不雨春山姿欲吐未吐胸之奇指端已覺氣出沒
眼底尚鬱天淋漓丹青洗盡太素顯彷彿乾坤垂闢時
誰為展助虛堂色恍有蛟螭蟠四壁摩挲紙素若未乾
矯首長空俄潑墨野夫抱膝一沈吟襄陽耕雲雲正深

亦知大旱為霖在終是南山隱霧心

殷司馬平廣西寇歌

殷公文武邦之損不學淵源空有名一歲再遷中執法
兼提六管嶺南兵如雲鵠鵲排千艦五色神羊映百城
征南將軍不穿札渡瀘相公單白恰軍聲雷動細柳營
殺氣霜凋大藤峽任是蠻烟開羽扇還留漢雨澆金甲
狼兵錦繡繡蝥弧奪得生徭換酒沽早知不殺稱神武
悔自跳跟作後夫處處春田催布穀朝朝列肆喚提壺

千秋獲嘉縣重覩伏波不得驕銅柱灘水灘和鏡吹聲
鬱林花滿旌旗路遙望蒼梧雲正蒼是公功成勒銘處
題萱壽太醫邢生母

橘井汲後綠杏林種時紅北護復何憂年年領春風珊
瑚作枝葉作玉海人添籌出海屋八千遐算應已知生
兒自是邢和璞

贈李生言恭

言恭常受詩於
吳高州故戲之

清揚少年美瓊玖槃躋風流眼前有豈獨生能讀父書

吾輩新篇不離口自言於世無所謀能工五言窮亦休
近來此物太憔悴汝不見五馬禿盡吳高州

趙松雪重江疊嶂圖歌

昔登江上山頗愛江上句天際識歸舟雲中辨烟樹長
風不起漁歌閒大鵠小鳬爭往還坐身突兀峭舊表著
眼莽蒼熹微間歸來舉頭觸四壁但覺膏肓有泉石誰
洗丹青開墨素令我蒼翠流衲席摩挲舊游亦如此彷彿
烟霞指端起山凹那當別有雲天低不辨誰為水吳

興王孫妙自知不諱前身為畫師直將平遠苔雪趣寫
出滉漾金焦奇老夫手挈盧敖杖更辦鷗夷五湖舫欲
作寰中汗漫游即披此卷神先往

董村小隱歌

丈人卜築董家村村中風物宛可論董家猶稱孝子里
丈人別作素侯門門前草沒車馬跡隣父雖過不爭席
數枝慈竹溪上青二月墻頭杏花白蠶子欲帖千芳齊
習習春風生杖藜人如畏壘無驚轍業學尸鄉不養雞

有田七百但種秫釀得新醪如刺蜜穀在何須用虎防
杏成任自從人乞有子策奏天人奇回頭却笑昌黎詩
男兒遇酒即快飲人不識安用天公知

吳孺子游人間僅一瓢後破書此慰之

吳郎手攜長生瓢自云巢許同消搖偶然洗潁瓢破碎
赤手向余不得驕男兒有身差足慰况乃生無向平累
揖予竟作汝南游別有壺中貯天地

題大石聯句卷後

吳中大石一片石崖罅穹窿俱辟易芙蓉夕照千丈紅
明鏡朝吞五湖碧學士詞場老供奉四子講德皆其匹
苦吟石鼎聽蠅似豪氣城南鬪雞敵欲將八百驪珠顆
奪取三千龍劍色李姓太僕北海後此書謂得蘭亭脉
題押人人滿騫亞褒評字字袁昂直錢郎畫手真自好
三尺生綃拔山力已令中郎見典刑不作無鹽難飾畫
問誰購者復誰氏凌君夙抱臨池癖掣得吳興白練裙
換來曇壤黃庭蹟我歌此卷一相贈前輩風流宛如識

若到君鄉莫輕展恐壓峴山游不得

歌贈程孟孺

程郎少年雅好奇萬事不得勝臨池指端虹霓出鐘鼎
眼底負鼎騰虬螭有時屈筆作小隸薦季直表麻姑祠
東游吳會訪八法祝文逝矣不可追擔夫爭道大娘舞
屋雨痕漏夏雲垂此曹端豈為書出一觸萬解吾真師
小舒大密有奇際內擲外拓無專規老夫強作解事語
腕中有鬼奚以為程郎書成復自疑世途往往輕毛錐

縱然投筆要爾去倘寫百尺燕然碑

岨峽歌題畫贈張中丞肖甫

帝遣鴻濛奠西極擘作岨峽兩拳石南含女兒萬疊青
下注岨江雙練白峰頂平懸日月觀泉端對寫烟霞色
嚴道之陽絕紫金勾欄以往無白壁豈謂扶輿歇靈秀
固知真宰鍾詞伯中丞昔時此中居鷹隼為友龍蛇俱
空庭種葯成書帶大鳥銜鱣非鰲魚銘就孟陽輸劒閣
賦成得意薦相如南山猿呼北山鶴九折驅車亦不惡

二華星窺一帳褰三江雪噴千帆落賓從如雲擁朝暮

旌旗合還橫寥廓猶自踟躕思錦鄉尊鱸乍發步兵狂

東吳王孫畫窄罇

錢叔實吳越王孫

西蜀公子神飛揚

杜詩天上張公

子皆用太冲賦語

初疑筆作蛾眉嫵便欲身依白帝傍野夫為

挽中丞住不作中丞意中句文成赤松事已遠壯武青

萍喜初遇况乃潘輿處處安何煩却返王陽馭

石公山觀日没月出歌

我登石公山其顛據湖心東西兩輪對出沒東輪黃金

西紫金紫輪冉冉破天碧羲和鞭揮六螭息霞使雲君
儼猶扈金支翠旗光艷奕少選東輪際空起萬頃衝波
波欲靡稍出為鉤漸為玦餘光如練俄如綺狂夫舉觴
觴不空時有五彩行其中半嶺初收火齊鏡千家仍浸
水晶宮笑謂此兩輪中藏赤烏白兔搏弄千古萬古今
夕落吾手匹如宜僚能使凡上復凡下此湖自稱等溟
渤往往雙眸際窮髮那知若木與扶桑只在三吳一杯
澗若論鄒衍大九州更有諸天千日月六合之外多可疑

君但快飲莫少稽側耳徐聽鳴天雞西輪欲東東亦西
汎湖風浪小橫嘲諸同游者

包山老人出山早老去忘却包山道曹子鬚髯枉如戟
瞥見湖波驚欲倒烏衣從季酒不停少停一卮面即青
張郎畫手空自好閉眼不敢酬山靈李生北客黃少年
倚醉強作東風顛謾道洮陽能破浪從它安石也迴船
野夫翛然神獨往吾弟酣歌氣逾爽但使人間無二王
何人狎作五湖長

此翁篇再贈陸丈

此翁杯勺不近口種得秫田都釀酒此翁杜門時避席
每留王生竟日夕咄嗟水陸俄滿筵罷飲蕭條仍立壁
自矜畫理妙通神肯挂侯門壁上塵青山到處身為主
黃菊開時家不貧王生夙緣真自好攜翁畫歸還醉飽
為問支硎地有無買田築室將從老

況子行答吉甫叅政

況子高眠藥湖干九日散髮一日冠眼前浮雲富貴薄

筆底白雪交游寒二千里外飛尺素十八年前論寸丹
男兒意氣當如此區區得失那足齒縱令罵坐灌將軍
豈有酖人羊叔子世上流言窮自定吾徒傲骨生難已
君不能揚舲下建康我不能張帆上豫章長江浮沉恨
書驛落月夢醒愁空梁豫章宗人貧孟嘗余生少貴輸
柴桑大兒文舉小德祖野鷺可似家雞長君知犯斗雙
龍劍元是吳工冶後霜

柳公權行書契詩後序卷

永和一叙筆神絕遺刻居然走千古興公文是擲地聲
安石詩為碎金語羣賢爾時氣爭王那應零落同塵土
絹素風神出豪鷲柳家新樣疇能覩鋒距寧登由也堂
委蛇耻效邯鄲步嗚呼開元以還骨格變誠懸亦是書
中虎不辭傾橐為買將欲傍墨池追定武君不見魯男
子矻矻可畏哉自云善學君之祖

孫郎行贈雲夢山人斯億

孫郎狀如紫石稜虎頭傳神謝不能衿裾潦倒頗自厭

瓦礫往往從人憎胸中一寸貯全楚下筆縱橫破萬古
白雪寒從郢里偏雄風高向蘭臺吐烏綸折角屐齒傾
入門小兒呼自驚少選長歌出其袖虹霓繚繞天崢嶸
若道孫郎不好名何得千里尋王生若道孫郎好名者
何不北走長安城男兒有眼豈在面世途耳觀那足羨
眼中之人君自見

白石翁畫贈吳文定山水歌

君不見白石翁墨花破萬紙散落世眼中其間方寸地

貯一太史公是時太史稱吳儂三載磊塊蟠翁胸太史
趣朝天青雀凌春風有淚不作李都尉有賦不擬江文
通直將三寸管五丈素寫出江南千峰與萬峰盡收蜀
錦囊壓倒太史之奚僮絕壁直上高穹窿呼吸似足開
天聰忽復下墜數千尺俯身欲入鼇鼉宮意者徑路絕
乃有雲霞封萬古不盡流洗出玉玲瓏側耳將聽之疑
是縑素間迸作羣靈靈長飈無形百草虎茸列缺崩崖
吐出恠松歷亂羽葆屈蟠虬龍將崩未崩石似舞欲斷

不斷橋飛虹迺有詞客酒人樵青釣童或騎蹇驢或駕
輕舫或躡蠲屐或策短筇高者穿木末若蜚鴻下者躡
跚勃窣如孤縱兩儀不能主乍闢而乍蒙二曜不定光
倏西而倏東木棧與鳥爭道人擬鵲開牕漸窮至杳
靄但有去路無來蹤猶云紙盡意未盡亂石拳點波洶
洶真宰泣訴神無功太史不能長將向天去流落人間
成楚弓翁亦召主城芙蓉但令居士緬几上秀色欲滴
青濛濛擊節董源隕涕關全筆底一掃傾宗工沈翁豪

翰何其雄嗚呼隆準之孫豈必隆

將抵潯陽戲作短歌

逾月不啖東家豬又不及買武昌魚橐中乾菜配濁酒
日日看山還讀書男兒三十興闌懸赤帶及至之官垂
五十欲辭白髮頭不能縱脫青衫淚堪濕為龍為蛇心
自知呼牛呼馬那敢辭有書且作老博士得酒便喚高
陽兒

弇州四部稿卷二十一

欽定四庫全書

弇州四部稿卷二十二

明 王世貞 撰

詩部

七言古體四十二首

廬頂放歌

匡續先生幾千載周顛僊人安在哉聞聲便喚竹林寺
見影頓築文殊臺浮雲四起忽無地舉足步步愁莓苔

吳越應從下方出岷峨別向西天開擬呼聖燈照迷去
更借鐵船凌漢迴山僧一笑挽我袖何如且住傾三
杯

城西書屋歌為趙中丞良弼

使君不能誅茅汝水濱又不欲踏汝寧塵以茲但築城
西屋買斷桃花三月春使君讀書破萬卷一上公車成
鸚鵡毋論猿鶴怨後心縱有雲山夢時面即今休沐暫
為歡里人恐驚獬廌冠西門令尹過從易東郭先生杖

履難王子一為歌書舍更遣錢郎與君畫展罷烟霞四面生歌成飛瀑南牕挂使君百邑上頭居天子時時賜璽書但到會心聊一看何須不食武昌魚

題孟里圖壽尤母

尤郎頰鐵虬髯紅矯如嶧陽霜下松手攜客圖孟家里歸壽阿母觴春風孟母三遷去其故尤母却守先人宮啖子不必東家豬食親不必兼魚熊義方但就養志好圭華也自春風中

題趙承旨陶令像鮮于太常歸去來辭贈致政太宰楊公

陶令生平興蕭瑟到官毋過八十日五株楊柳勝栽花
百畝公田都種秫拂裘長歌歸去篇舁簞豈是膏肓疾
世事從他三復四生兒任昧六與七却恠渠祖長沙公
婆婆八十諱稱翁即論運甓鈴閣底何似抱甕春畦中
孤劍雄扶江左日一絲高挽義熙風忘年自識將軍意
易姓方憐處士忠千載從人論行止誰似關西楊伯起

力在寸心輸社稷功成餘事施山水未老能拋太尉章
得歸即號柴桑里五男却是五麒麟海內俱稱萬石君
今去山中看宰相由來平地有仙人吳興才子工寫真
漁陽老手書絕倫風流一代不可即翰墨萬古恒如新
我題此圖見微嚮須從跡外探心賞長沙太遲彭澤速
君臣道盡公當往

淮北吟

二月忽破三月來淮南尚可淮北去欲借春光寄膽瓶

著花不見沙邊樹酒杯即防兒輩狎物色難遣吾詩遇
似應官職解相趣其奈年光留不住婆婆老態時一生
蓄育間愁日千緒江左鶯花了何限大抵英雄回首處

甲戌春暮再入都憩善果寺逢杏花作

東風吹車入精蘭晨鐘數杵雞聲殘龐眉老僧來揖客
慈雲帶春春未闌牆東杏花一樹白於霰時有流鶯啄
花片我自驚逢今日花花應不記當年面莫言花落不
如人人老能如花更春唯有江頭探花使祇今還作踏

花身流鶯欲答忽飛去恍忽如歌舊游句但使新豐酒
價平老夫得住聊須住

王太夫人七袞

王家琅玕一何衆大母春雲穉中種八子俱為荀氏龍
諸孫三見河東鳳是時太僕歸其鄉舞衫盡出宮羅裝
瑯琊釀泉春正美好奉潘輿萬歲觴

趙承旨天閑五馬圖歌

吾聞天子之乘有六馬五馬無乃諸王侯飛黃一骨立

天仗茲白甘足閒清秋有金不敢將絡頭奚官屏立氣
致柔玉毫如霜落勁刷傲儻暫攝歸優游銀槽首宿露
不收綠波溢吻芬錦韞懸蚕齒夏快自酬宛如雙虹繭
雲浮功成身貴人不知奉車驂乘白玉墀君王縱復日
三顧此足敢忘追咸池吳興學士曹韓師寫出蹠躐千
金姿得非飲至平南時數百萬匹皆權奇嗚呼渥洼之
種悲不悲真龍却走陰山垂

沈翁歸自給諫疊石為二山居之後卒而其子叅

議君顏其齋曰存石志不忘也王子為作歌

沈翁昔日補天煉五色天漏縱橫完不得且從河漢覓
支機肯向陵陽泣含壁一拳氣奪二華青雙嶺寒分洞
庭碧似壓鬱林太守歸况負奇章相公癖翁今已矣石
尚存內史不忝翁家門尊者衣冠拜稱丈餘者羅列皆
兒孫肅然乞我一詩去欲披薜網穿雲根嗚呼漱何必
孫荆齒冷何必夏統腸渴何必王烈髓饑何必鮑靚糧
若翁有官不終日男子立骨須堅強奇嶽砢俱無妨

得魏懋權書却作歌呼之

戊辰十月贈汝詩忽汝詩名加我大每爭趙壁輒光彩
及博燕金多坎坷蹉跎國士心內私鹵莽時人眼前過
汝弟何由玉刻名汝書空自珠生唾六月挑燈啟緘讀
清霜片片燈前墮男兒得意失意在一時蜥蜴行水應
龍卧老夫中歲罷膏沐晚得承恩髮如劉蘭陵美酒鸚
鵡卮將汝愁來為汝破

史錦衣李勲衛邀飲顯靈宮分體

縱帥不踏金吾門子侯不愛平陽勲豐城巷西買山色
日有山人來論文其北琳宮創先代深林往往棲白雲
直流頗類陸修靜有酒肯避陶徵君二侯飛騎四呼召
河朔故事君不聞冰絃再鼓動秋氣銀燭數行催夕曛
老夫華髮忝祭酒醉客朱眼同叅軍牕前繫柳紫茸轡
硯底飛華白練裙黃冠手捧帝宸翰彷彿五色烟網縕
茂陵玉盃亦自出樂通金印何足云桑田已解滄海變
華胥倘道糟丘分明朝折簡但致我得醉何必皆同羣

題白雪山房贈李勲衛言恭

冰公驅卒入蔡州
白旄寒壓銀兜鍪
有孫不寫雲臺色
却寫吾家王子猷
去年夜半燕中曙
天花散入臨淮署
涓畔何山是玉山
牕前幾樹真瑤樹
主人鶴氅芙蓉巾
亭亭姑射仙丰神
寸絲立起洛陽卧
片語能開郢里春
土生邇來罷山水
為君冰絃重繞指
君莫問白雪樓鮑
山址樓中之人人
亦李君歌撒鹽差
可擬

于鱗有白
雪山樓

莫雲卿以詞翰妙天下一日而名動京師三事以

降莫不折行願交臨軒之對策名第一尋用郭有道例入太學別余東歸謂余勿以口吻筆札事人且如謝瀹之指口也感慨之餘聊成短歌為贈

男兒功名在十指隻字能傾洛陽紙除他丞相斷掃門若個公卿不倒屣共道臨軒第一人蹇驢依舊踏風塵自從元禮仙舟後處處諸生折角巾惟君與余交最厚臨別侃侃指余口歸去還窮禹穴書丈人但進新豐酒題望雲遙祝卷為表進士母

君不肯學衣夏甫行年四十一環堵有面那容世人識
早晚推牕拜其母今君射策已見收淮南白雲望莫愁
乞將千斛驪珠去顆顆能勝海屋籌

顏尚書送裴將軍北伐真蹟歌

天寶劍舞稱裴旻盤馬一決分十身燭如雷電繚四足
圓若日月搏雙輪顏尚書受顛史訣書筆暗與裴通神
武功不競國之耻五字欲掃祁連塵錐沙印泥紛並出
大篆古隸藏其真懸崖吐溜忽百丈墜石小轉迴千鈞

漁陽揭地動輦鼓尚書猶新裴已陳二十四郡委陴走
扼腕浩歎秦無人不看李郭萬人敵扶汝健筆刊嶙峋
嗚呼小技何足論

領鄖陽命出朝口號

五花小龍團墨勅生新寶鈔鴉翎黑黃封餌合紛後隨
法酒三杯壯行色縱然才劣忝軍鎮稍喜時清偃兵革
節度從他學襄樣征南自古多書癖碧油幢底見故人
喚作麓官麓亦得

瞻美弟授太醫院幕職時余有鄭襄之命同歸至
江口而別占一歌為贈

少不欲作貲郎若黃次公晚不能舉明經若菑川翁公
車旦請暮召試唯挾軒岐書一通烏紗角帶繡練雀小
駟許踏長安紅無且藥囊日提冠何似角里採秀商顏
中東方小遺建章殿何似陶令醉卧北牕風耳邊三婦
但歌豔眼底五陵誰解雄有冠不必挂神武留作漉酒
歸江東汝兄開府謾言貴挾影蕭然下渚宮

途次贈莫山人公遠歌一章

山人到家僅四壁山人出門無一錢
岑參我兄常建弟安能改絃媚少年
長安筆耕何限子時清不奪朱門權
山人失意掉頭去幙被淒涼下廣川
那能比肩郭泰舫乍可寄鱸張翰舫
吾伊新句不離口有似枯木號饑蟬
少年齒舌利於戟展轉千秋復可憐
古來好筭非所論吾意亦欲琴無絃

過八公山作

八公昔事淮南王丹成不救淮南亡人言淮王上天去
八公驂乘同翱翔不然五百餘年後能使氏眼成蒼茫
白石依然白鼻馬綠楊俱作綠沈槍晉祚靈長豈在汝
嗚呼女輩誠荒唐君不見淮南城外兵百匝淮南令公
朝玉皇

雪後壽陽道中

壽陽城頭雪千尺壽陽城外天一色雙驅候騎玉初破
一點饑鴉青不得當時車騎飛渡淝八公草木皆旌旗

若令覩此瑤瑤樹却憶儂家兒女詩

過固始許忠節公祠

朱郎殲丞伏兵發少年使者皆獨裂建禮門前一腔血
飛作彭湖斗間鐵義旗十萬橫江起忽有長虹穿賊壘
一時縛纍如縛豕逝者人耶生者鬼龍章再錫帝寵稠
猶聞曲突心未酬不令長孺寢逆謀漢闕要挂吳王頭
固始祠中栢色古父老椎牲考鐘鼓南有孫侯北有許
令人扼腕悲壬午

癸酉冬余遷嶺右阻大風江上武陵夢玄子於信
夫輕舟過訪劇談三宿而別甲戌冬余領襄漢節
甫之鎮而信夫書至矣余且將有太和之登信夫
能修江上故事躡屩從我乎歌以招之且紀舊事
北風吹江浪黏天嶺南方伯夜不眠牀頭啾啾泣龍淵
忽覩一葉凌蒼烟中有虬髯頰頤鮮鵝冠鹿裘當風翩
人乎鬼歟非耶仙武陵居士於夢玄兩為循吏嘉隆年
眼中不挂石二千歸來拍手桃花顛自云百願早已捐

唯不忍割龍門緣劇談三畫舌本穿驪龍頷珠亂唾舩
緩頰坐奪馮夷權我自鼓枻吳淞邊君亦西歸渡沅川
三方鵲印書生懸此事豈足秦人傳芳洲蘭芷若可搴
青鳥銜送麋臺巔今我太嶽尋真詮倘有乘蹻飛我前
虬髯頽頽人依然把臂並駕雙虹輶毒龍脫銜飽老拳
叩閭且上天公箋乞汝十頃耕芝田

陳丈子兼自蜀右轄謝事歸數辭徵召養性自適
唯詞翰流傳人間耳今年七十而神明愈茂時余

方填郎襄未能趨賀賦此寄懷

陳翁自解西川事里社浮沈十餘歲家中丈室呼已寬
門外扁舟多不繫春花秋月長有餘石湖虎丘恣所如
憑將尺牘名驚坐留得元方客下車昨者親聞相君說
正始風流元自別羊裘欲訪恐不知羔鴈雖饒或虛設
紅顏細膩蒼髯虬健脚翻使方印愁足下今年政七十
可作栖栖周益州

思歸吟

庭前衆枯得春發不病胡為但忽忽久成清世齒外人
可作時賢眼中物千言辨諱諱奈何六州鐵鑄錯更多
今朝中酒昨朝醉西隣哭死東隣歌男兒捫腹一太息
安能低眉望顏色仕宦寧堪生耳車歸來亦豈無瑕石
不煩公家費俸錢亦不願使篇章傳支頤抱膝看山色
更有一計銷殘年

武當五龍歌

昔時五龍化五公口授睡法希夷翁恬然一境天地外

晉漢周宋皆為空君不見南陽卧龍卧隆中魚水萬古
君臣同定軍山頭堊龍蛻赤帝燼息龍何功嗚呼五龍
之睡睡亦濃左耳忽割不可蹤龍潛龍躍各有會即使
終卧誰知龍

武當道上所見戲成短歌

南陽少婦道人裝皂紗蒙紉白帟方口誦彌陀數聲佛
手齋玄帝一瓣香有女求如南海相生兒早作繡衣郎
堆箱越織重重錦拄棟吳粳粒粒霜孔雀纏枝雙到老

芝蘭長砌玉成行是時玄帝征魔返十萬黑幟摩空翔
覆額難晞九陽髮徒跣長瘞修羅霜人間福地有如此
明日幡然辭上蒼即勸彌陀亦還俗毋煩接引向西方

武當歌

黑帝不卧玄冥宮再佐真人燕薊中乾坤道盡出壬午
日月重朗開屯蒙人間大小七十戰一勝業已歸神功
久從北極受尊號却向西方稱寓公武當萬古鬱未吐
得吐居然壓華嵩是時豈獨疲荆襄雍豫梁益皆為忙

少府如流下白撰蜀江截雲排豫章太和絕頂化城似
玉虛彷彿秦阿房南巖宏奇紫霞麗甘泉九成差可當
十年二百萬人力一一捨置空山傍嗚呼英雄御世故
多術卜鬼探符皆恍忽不聞成祖帝王鬚曾借玄天師
相髮漢武空邀王母過高真不顯宋宣和功名雖盛毋
乃晚混沌時來當奈何

苦熱篇

常年游燕復游楚今年坐嘯鄖山阿常年六月猶能襪

今年五月頭仍科六月襍襍不道苦翻道科頭未易過
赤龍頻頓羲叔轡金翅欲掃尼連河未必襄王行暮雨
由來漢渚有蒸波老夫弄水聊自解忽照霜鬢胡其多
炎涼世態日千變滅滅欲火時成魔蘭臺大風吹汗漫
峨眉積雪寒嵯峨縱令有夢不解到據梧斗室時婆娑
天大洪鑪銷玉液柰此清涼一點何

贈李使君本寧之陝西分省歌

去年嗣宗客薊門腰下寶玦貽王孫不知私語何所道

但道阿戎勝阿渾汝忘少年我忘老吾弟翩翩詩亦好
罷酒行趨長樂鐘更衣醉藉津陽草忽傳春色厭承明
驄馬驂驪下玉京是時吾仗渚宮節秦山漢水遙相縈
紫微花開紫微舍笑撫金魚紫微下年同北府荀中郎
官豈江州白司馬健兒投筆不足奇翻手覆手在一時
第栽梧竹棠陰後應須還汝鳳皇池

輓洞庭漁人孫仲可

孫仲可者諱宜其父按察副使世其德靖間名

臣也仲可少舉鄉進士有聲一再上南宮不利
遂棄去扁舟斗笠放浪江湖間因自號曰洞庭
漁人人呼漁人則應呼前進士則不應也詩自
漢魏古選以至少陵歌行近體靡所不合文爽
爽有二京風僅踰下壽以卒海內聞而惜之余
游楚與其子斯億善因追為洞庭漁人輓歌一章
孫郎氣壓任公子欲截長虹作鈎使帝憂三島逐浪翻
不遣神鰲受其餌歸來却作王弘之無魚可賣稱漁師

洞庭黏天八百里處處輕舠繫酒旗人間限滿不肯住
忽逐琴高上天去驪珠顆顆猶自圓鯨背茫茫竟何處
蹇余欲探桃花津水遠山長愁與論椒漿但熟且須酌
有子解喚蘆中人

孫兆孺華陽巾歌

兆孺貌寢而學甚博常戴陶隱居華陽巾客多
為作歌紀之余亦和焉

通明玉京墮來身秀眉長額飄鬚鬢皎如野鶴翹鷄羣

有冠却挂神虎門歸來自製華陽巾皂角出沒中茅雲
手抄隱訣名登真松風不厭旦夕聞後千餘年有孫君
自言曾受十賚文巾陶所巾鹿皮裙訪我海上霏烟昏
父老巷視兒童奔俱言神仙來試人願孺實此貽諸昆
後有優孟能稱孫

九友齋十歌

齋何以名九友也曰山曰水齋以外物也曰古
法書曰古石刻曰古法籍曰古名畫曰二藏經

曰古杯勺併余詩丈而七則皆齋以內物也是
九物者其八與余周旋而一余所撰著故曰九
友也九友得之有早晚亦有從余而游與留而
不能從者其不能從者既日思御而從者亦倦
而思歸矣秋日山鎮無事每一及之不勝尊鱸
之感乃成十歌所以有十歌者併余身而十亦
歐陽居士六一意也

老詩忽愛愚公策大編移來洞庭色玉峰英嶺苦無價

錦川武康差亦敵神鰲忽捧三巨簪靈鷲俄銜一拳
石夜深滄海珠蚌開秋淨虞山佛頭碧陰森古洞若
無際窈窕穿中誤游客昔稱九宜堂雨晴雪月宜四
時人云百事百盡宜縱令百宜百不知主人自逐褰
陽兒一城斗大不納節桃花笑折東風枝有歌且擬歸
去兮

其二

醉鄉懶侯治生涯青山十畝水倍之弇州堂背一片綺

不減衛府芙蓉池稍西九曲面山出恍若螺髻堆琉璃
刺篙中流月破碎迴櫂小港花追隨銀鱗潑刺跳波響
朱頂嘹唳從風移主人醉眠客行樂客眠主醒鷄喔
喔早聞青鳥喚葫蘆除却白衣無剝啄壺中天地不
長情畫裏江山難着脚以茲毋若歸去來虎頭為汝
開丘壑

其三

老妻不需賣文錢稚子不索故衣穿跌宕豪翰凡幾年

狂搜酷賞貪蚩緣成侯遺墨朝霞鮮右軍慘淡如春烟
永興生色出指間河南精鐵含純綿白雲秘授藏真詮
錐沙印泥顏法全河東勁細鐵線纏眉山而下可十賢
鸞騫猊挾龍蛇顛從汝晉楚復梁燕墨池筆冢蕪欲田
胡不歸展彥遠編飽汝眼青腹便便

其四

玉匣昭陵閱真跡夢寐中山一片石頗從庶息見隆準
三米蘭亭亦其匹太清樓頭六卷餘恍若清廟朝霞舒

潘家古絳復入手色絲幼婦誰當如鍾梁禪進美於玉
虞歐李顏看不足饒輸六一畫舫齋更讓二十金石錄
山長路遠難相依即汝思之胡不歸莫言林下日會遲
君不見幼安死貴信本癡一眠三日僅一碑

其五

雖有吳鉤名龍泉匣之不試泣清鈇雖有蜀琴字松雪
五指不慣同無絃何如萬卷鄴侯架天與雙眼長周旋
咸淳初刻班范史往往八法開歐顏其他七部可指數

浮提漆潘苔文箋湘滕襲帙牙作籤清香古色時鬱然
老夫不願乘赤鯉願作白魚游其間歸去來飽吃三字
成神仙

其六

我聞瞿曇四十九年說法無一法其如阿難總持成百
夾鳩摩蓮花舌本生玄奘舍利毫尖發白馬東來象教
崇青牛西去微言空成都玉局授書後漸與金仙相對
雄光庭靈素不須病雅有片言為破諍但令世幻一切

捐法寶玄珠炯雙睽歸去來何快哉兩藏恰面湖山開
我不能一麻一米骨作柴亦不能噉硫黃鍾乳十二釵
顧家阿瑛豎子爾亦解僧帽道人鞋光明藏中大自在
有骨不借青山埋

其七

苦吟頗受天地疑晚節却愛無聲詩丹青不知老將至
何況區區富貴為周郎寫情兼寫姿右丞妙理尤吾師
烟江春嶂有都尉平遠秋山輸郭熙莫將剝水惱馬遠

十二幅吐胸中奇吳興心法歸大癡蒙繁瓚簡各有宜
二百年來僅沈戴直取悟境遺筌蹄此曹十指解縮地
能令四壁分四時歸去來未有期篋中百軸爭色飛汝
車生耳手生棘曷不舍卧南山陲宗家故事知不知

其八

男兒有興須有適生不願十二金釵恒密席牀頭琥珀
如欲訴夜半篝燈壓春滴梁園寶尊蟠雷文叔夜遺鎗
鬪天色碧筒瀉出仍啾啾青眼傳觀爭嘖嘖君不見舒

州杓鸚鵡錨李白與爾同死生舊交零落漸已盡何可
一日無二卿歸去來萬事平麴生叩門卿即應

其九

西京以還十九首東周而上三百篇檀弓魯論諸國策
其言雖貴人茫然豈無五車載惠子尺炬併付驪山烟
我生何幸雪未顛著成百二十萬言毋論愛者似鷄肋
在我亦足成蝸涎何必要什襲藏名山何必要咸陽市
上千金懸歸去來一壺美酒抽一編讀罷一枕牀頭眠

天公未喚債未滿自吟自寫終殘年

其十

汝今行年已半百紅顏欲皴鬢強白人間治否豈係汝
胡不歸來長跼蹐祇園山水天與開酒館圖書世希識
蒼松翠竹月何限酒美茶香春鬪碧行間字字挾風霜
句裏聲聲戛金石莫言七尺世長物借汝暫作千秋宅
豈惟千秋借七尺九友憑誰吐顏色只今為汝進一言
微吟淺斟縮脚眠歸兮且奪天公權

文皇御槍歌

相傳文皇御槍在午門中樓黼座之右甲戌仲
夏六日世貞以朝退偕其僚得寓目焉槍以漆
攢竹為柄有黑纓懸黑旌若號帶者中繡列星
之屬槍柄為刃痕者三旌為矢穿者五按記稱
文皇每遇大敵輒率驍騎衝中堅繞出敵後舉
旌颺之士爭奮敵輒大潰此即所執銳也其明
年茲日鄖鎮追成一歌以紀其盛

天欲大統歸文皇健兒插羽起冀方隆準重瞳美髯秀
如雲黑幟綠沈槍幟尾絨排七曜色槍尖鐵浴九秋霜
毋論此槍丈二尺尺刃能為萬人敵燿如掣電長繞身
裊若修蛇四生翼銜枚直透深陣後立表時懸伏兵色
白溝河潰呼吸中金陵鐵甕無堅墉保兒身手豈不健
凡介豈敢追真龍紫茸甲彫赤驃死若論元勲此槍耳
貫鏃中穿懸昧白捍刃痕多斷鱗紫星斗長依黼座邊
虹霓不吐太平年寧如漢祖斬蛇劍武庫風多遽上天

友人毛仲章文學棄諸生隱居自適銅梁張使君
有真逸之目須予詩闡之因成短歌一首

中丞積金傾五侯有孫了不掛雙眸手攜束書廢箸出
日與西京數子游自言生命無貴格半幅青衫消不得
但可人傳毛氏詩何須色喜廬江檄張卿采訪過吳門
與生意氣時相聞手題真逸榜茅屋又見華陽陶隱君
老夫月旦落人口那用區區尋敝帚縱汝於名未盡忘
不在身前在身後

寄贈陸丈叔平時年八十城居矣

支硎舊居花似錦日日青山對高枕
欄中養鴨自呼名籠裏焙茶仍第品
縱令丹青妙入神懶與探微作後身
但傾鑿落天地老偶染側理雲霞新
丈人畏俗不畏客丈人逃名名轉迫
驃騎門前聘難致雞林市中購即得
近聞頗倦襄陽耕共驚龐公初入城
間從弘正語舊事雅嗣文沈稱先生
衆中論交余最後每得余言誇不朽
肯向芙蓉池上游巾箱雜物皆翁有

偶成

葉公好似龍冀與真龍遇真龍一夕來葉公不知處楚
猴重瞳那足論殺心枉自橫鴻門亞夫望氣四十里當
面失却韓王孫

七言小律

李駙馬歌

花底紅藤引碧油青春都尉正風流粧成弄玉俱調管
埽就鋪金對賭籌却笑大功坊裏客猶煩十指覓封侯

其二

白玉雙侵鬢底鴉含挑的的破蓮花
黎明澡盥金平脫
薄暮溫湯玉辟邪
最耐內人俱國色不知若個是家家

出塞

玉門關外草芊芊
磧裏沙黃上接天
固杆將軍頻按塞
車師校尉復留田
自是書生無燕領
年年金印妬龍泉
江提刑宅歌者

使君歌管出遼巡
白苧驚飛梁上塵
曲罷愁他霜漏促

相期一醉便經旬乍能間闔尋吳子那可揚州作貴人

又

誰家青衣鬢欲皤秋天一曲勝韓娥初疑夕籟流銀漢
復似松飈寫綠波君問長安環珮客幾人曾解聽吳歌



弇州四部稿卷二十二